

Decreto/2023, do XX de XXXXX de 2023 polo que se crea a rede de Nodos de innovación e se establece a súa composición, organización e funcións.

A Lei 14/2011, de 1 de xuño, de Ciencia, Tecnoloxía e Innovación, considera a investigación científica e técnica como concepto equivalente á investigación e desenvolvemento, entendido como o traballo creativo realizado de xeito sistemático para incrementar o volume de coñecementos e o uso dos mesmos para crear novas aplicacións, a súa transferencia e divulgación.

É neste contexto en que a Lei 5/2013, do 30 de maio, de fomento da investigación e da innovación de Galicia, veu establecer o marco para o fomento da investigación e do desenvolvemento tecnolóxico, da transferencia e valorización de resultados e da innovación en Galicia en todas as súas vertentes, así como a súa xestión eficiente. Esta lei recolle entre os seus obxectivos no artigo 2, «favorecer e impulsar a innovación na xestión da Administración xeral da Comunidade Autónoma de Galicia e do resto do sector público autonómico de Galicia e buscar a efectividade e a eficiencia, así como o máximo beneficio e servizo ás persoas usuarias».

Os servizos de saúde maduros desenvolven sistemas de xestión da investigación e da innovación, e convértense en xeradores de melloras e riqueza, a través de novos produtos e servizos. Nestes sistemas, débense aliar os obxectivos de I+D+i, os seus esforzos, recursos e talento, coas necesidades non cubertas, preocupacións e obxectivos reais da organización.

A Lei 8/2008, do 10 de xullo, de saúde de Galicia, no seu CAPÍTULO III, da investigación e a innovación no Sistema público de saúde de Galicia, establece entre os seus principios xerais que «todos os centros e servizos sanitarios estarán en disposición de favorecer e desenvolver a investigación, e promoverán a cultura científica, tecnolóxica e de innovación» ademais a Administración sanitaria promoverá «un modelo de innovación aberta orientado a impulsar a creatividade, a cooperación e a aplicación no sistema sanitario dos cambios que aporten valor a pacientes e profesionais».

De conformidade co anterior, polo Decreto 22/2013, do 24 de xaneiro, creouse o Consello para a Innovación en Materia Sanitaria, como órgano de carácter permanente e consultivo no cal participarán persoas de relevancia en materia de innovación en saúde e cuxa finalidade será a promoción da innovación na Consellería de Sanidade e o Servizo Galego de Saúde.

Ademais, a través do Decreto 112/2015, do 31 de xullo, creouse a Axencia Galega para a Xestión do Coñecemento en Saúde e aprobáronse os seus estatutos. A dita axencia é unha axencia pública autonómica que se encadra dentro das entidades públicas instrumentais reguladas no título III da Lei 16/2010, do 17 de decembro, de organización e funcionamento da Administración xeral e do sector público autonómico de Galicia e ten como fins xerais e obxectivos básicos actuar como un instrumento de xestión da formación no Sistema público de saúde de Galicia, así como o fomento e a coordinación da investigación nas institucións sanitarias do Servizo Galego de Saúde, a coordinación e o impulso da actividade innovadora da Consellería de Sanidade, e do Servizo Galego de Saúde, e a avaliación de tecnoloxías e servizos sanitarios, así como a formación continuada dos/das profesionais das institucións sanitarias.

En desenvolvemento dos seus fins, e dentro do marco global da política pública e da planificación da investigación e innovación a Axencia ten entre os seus obxectivos «aplicar o modelo de xestión da innovación sanitaria aberta da Consellería de Sanidade e do Servizo Galego de Saúde, coordinar os órganos colexiados da Plataforma de innovación e aqueles outros relacionados coas actividades de innovación», atribuíndo, no artigo 18 dos seus estatutos, á Área de Desenvolvemento e Innovación Sanitaria da Axencia a execución e xestión de proxectos de investigación e innovación sanitaria e o deseño e execución da estratexia de valorización da innovación sanitaria desenvolvida no Sistema público de saúde de Galicia, dando soporte ás actividades da Plataforma de innovación sanitaria.

A rede de Nodos de innovación sanitaria busca que os profesionais do sistema sanitario público galego, pacientes, coidadores, empresas e demais perfís implicados no sector da saúde acheguen as súas ideas de mellora ou proxectos co fin de substituír procesos ou servizos pouco eficientes por alternativas de maior impacto. A rede recolle, valoriza e acompaña estas ideas ou proxectos co fin de convertelas en proxectos con resultados aplicables á realidade cotiá da práctica asistencial e estendelos a todo o Sistema Público de Saúde de Galicia. Para a promoción e dinamización da achega de ideas á rede por parte de calquera profesional do Sistema Público de Saúde de Galicia constitúese un Nodo de innovación en cada unha das sete áreas sanitarias de Galicia xunto cun Nodo Central que recae na Área de Desenvolvemento e Innovación Sanitaria da Axencia Galega para a Xestión do Coñecemento en Saúde, para a canalización das ideas dos profesionais dos servizos centrais, e que realizará funcións de coordinación da rede.

Ademais en tódalas áreas sanitarias existen salas ou espazos de colaboración ao dispor das Áreas Sanitarias para realizar as reunións do Nodo e para manter encontros de traballo entre os profesionais, abertos á colaboración con outras entidades do ecosistema de innovación na proposta de ideas innovadoras e a pensar conxuntamente as solucións.

Nese senso, no artigo 6 q) do Decreto 134/2019, do 10 de outubro, polo que se regulan as áreas sanitarias e os distritos sanitarios do Sistema público de saúde de Galicia, se recolle entre as competencias das xerencias potenciar a cooperación en materia innovación entre o sistema sanitario público, outras administracións, as empresas e as universidades, sobre todo coas da Comunidade Autónoma, sen prexuízo das competencias atribuídas á Axencia Galega para a Xestión do Coñecemento en Saúde.

A normativa e os antecedentes mencionados fan necesaria a regulación da rede Nodos de innovación da Plataforma de innovación sanitaria, co fin de formalizar a súa organización, ámbito de actuacións e funcións, co obxectivo de impulsar e fomentar a innovación no ámbito sanitario.

O decreto consta de 16 artigos divididos en dous capítulos. O Capítulo primeiro (artigos 1 a 12) refírese á creación, funcións e composición da rede de Nodos de innovación sanitaria, e o Capítulo segundo (artigos 13 a 16) dedícase ao desenvolvemento e implantación de proxectos innovadores. Completan o texto unha disposición adicional única relativa á inclusión da participación nas actividades da rede de Nodos de Innovación como mérito na carreira profesional, e dúas disposicións derradeiras relativas á habilitación para a execución das súas previsións e á entrada en vigor, respectivamente.

Na súa constitución cumpriuse co establecido no artigo 15 e seguintes da Lei 16/2010, do 17 de decembro, de organización e funcionamento da Administración Xeral e do sector público

autonómico de Galicia que regulará xunto coa Lei 40/2015, do 1 de outubro, do Réxime Xurídico do Sector Público o seu réxime de organización e funcionamento. Así mesmo foi obxecto de publicación no Portal de transparencia e goberno aberto da Xunta de Galicia. Así mesmo, foi sometido a informe económico-financeiro da consellería competente en materia de facenda, informe sobre impacto de xénero e informe da Asesoría Xurídica Xeral.

Os trámites deberán seguir as previsións contidas nos artigos 40 a 43 da Lei 16/2010, do 17 de decembro, e nos artigos 127 e seguintes da Lei 39/2015, do 1 de outubro, antes citadas.

Finalmente, no exercicio desta potestade regulamentaria, e en prol da mellora da calidade normativa, esta Administración actuou de conformidade cos principios de boa regulación, nomeadamente, os de necesidade, proporcionalidade, seguridade xurídica, transparencia, accesibilidade, simplicidade, eficacia e eficiencia recollidos no artigo 37.1 da Lei 14/2013, do 26 de decembro, de racionalización do sector público autonómico, así como no artigo 129 da Lei 39/2015, do 1 de outubro, do procedemento administrativo común das administracións públicas.

Na súa virtude, por proposta do conselleiro de Sanidade, e logo de deliberación do Consello da Xunta na súa reunión do XX de xxxxx de dous mil vinte e tres,

DISPOÑO:

CAPÍTULO I

Creación, funcións e composición da rede de Nodos de innovación sanitaria

Artigo 1. Creación e ámbito de actuación

1. Créase a rede de Nodos de innovación sanitaria, dependente da Axencia Galega para a Xestión do Coñecemento en Saúde, co obxectivo de lograr que a Plataforma de innovación sanitaria se converta na ferramenta transversal da Consellería de Sanidade e do Servizo Galego de Saúde para potenciar e xestionar os resultados de innovación sanitaria enmarcados nun modelo de “innovación aberta” e “innovación social”, canalizando as ideas dos profesionais, pacientes, coidadores, empresas e demais entidades implicadas no sistema sanitario e transformándoas en proxectos con resultados aplicables á realidade cotiá da práctica asistencial.

2. O seu ámbito de actuación será o do Sistema Público de Saúde de Galicia.

Artigo 2. Obxectivos da rede de Nodos de innovación

Os obxectivos da rede de Nodos de innovación son:

- a) Promover a innovación entre os profesionais e usuarios, situando aos pacientes no centro da innovación.

- b) Recoller tanto as necesidades identificadas como as ideas dos axentes do ecosistema de innovación para mellorar a experiencia dos pacientes na asistencia e os resultados en saúde
- c) Intercambiar as boas prácticas e actividades de innovación entre os nodos da rede de innovación
- d) Trasladar os proxectos de innovación exitosos realizados nun Nodo ao resto de Areas Sanitarias
- e) Avaliar de forma rápida e áxil as propostas de proxectos de innovación para detectar as máis prioritarias.
- f) Axilizar os trámites administrativos necesarios para implantar as propostas prioritarias.
- g) Buscar unha vía de financiamento rápido e directo para proxectos de baixo custo, compatible coa procura de convocatorias de financiamento para proxectos de maior envergadura.
- h) Promover a formación e promoción da innovación aberta entre os seus profesionais.

Artigo 3. Funcións dos Nodos de innovación

As funcións ás que deben atender os Nodos, en colaboración coas Xerencias das áreas sanitarias e coa Axencia Galega para a Xestión do Coñecemento en Saúde, son as seguintes:

- a) Apoiar ao Servizo Galego de Saúde e aos profesionais das Áreas Sanitarias identificar os principais retos de innovación de cada unha das áreas sanitarias, priorizalos e axudar na procura de financiamento.
- b) Dinamizar a xeración de ideas innovadoras en cada área sanitaria para lograr a súa transformación en proxectos e acadar a súa implantación, transferencia e escalado ao conxunto do sistema.
- c) Ser unha ferramenta en mans das Xerencias para xestionar e homoxeneizar o proceso de innovación na área, dende a captación de ideas ata a xestión dos seus resultados.
- d) Dinamizar e promover proxectos de innovación sanitaria que partan desde os profesionais, pacientes ou usuarios do Servizo Galego de Saúde.
- e) Dar soporte e definir programas de formación específica para a correcta xestión de proxectos de innovación, destacando la formación en Dereitos de Propiedade Intelectual (DPIs).
- f) Ser a porta de acceso ás fontes de financiamento competitivo nacional - europea xunto coa Axencia Galega para a Xestión do Coñecemento en Saúde para financiar fases críticas ou a intensificación de profesionais sanitarios.
- g) Dotar ás ideas ou proxectos innovadores de servizos de apoio metodolóxico e de xestión, facilitando o acceso a programas e fontes de financiamento.

h) Canalizar as iniciativas de innovación de ámbito nacional e europeo nas que participa o Sistema Público de Saúde de Galicia, coordinando e impulsando a execución das tarefas que correspondan ás Áreas Sanitarias nestes proxectos

i) Servir de ponte para implantar boas prácticas ou ideas innovadoras que se estean levando adiante noutras áreas sanitarias.

As funcións descritas anteriormente, deben sempre promover e respectar a protección da innovación, mediante Dereitos de Propiedade Intelectual (DPIs) co fin de non perder a vantaxe competitiva.

Artigo 4. *Composición*

1. A rede de nodos de innovación é unha rede de estruturas de coordinación despregadas nas sete áreas sanitarias do Servizo Galego de Saúde e dependente da Axencia Galega para a Xestión do Coñecemento en Saúde.

2. Establécese un Nodo Central de innovación que corresponderá coa Dirección da Área de Desenvolvemento e Innovación Sanitaria da Axencia Galega para a Xestión do Coñecemento en Saúde, que realizará as funcións de coordinación da rede.

3. Dependente da Xerencia de cada unha das sete áreas sanitarias do Servizo Galego de Saúde constituirase un Nodo de innovación, do que formarán parte:

a) Un Coordinador/a do Nodo de innovación nomeado pola correspondente Xerencia da área sanitaria, quen o notificará á Axencia Galega para a Xestión do Coñecemento en Saúde.

b) O Equipo do Nodo de innovación da área sanitaria, que contará cos membros que en cada Área sanitaria se consideren axeitados de acordo coa estrutura e as necesidades da mesma, ata un máximo de 15 membros. Para garantir o bo funcionamento e canalización das actividades e proxectos de innovación do nodo, recoméndase que o equipo conte na súa composición con persoal de perfil sanitario, perfil administrativo e perfil de tecnoloxías da información. Deberán estar representados todos os distritos sanitarios que conforman a Área correspondente. Na mesma incluíranse profesionais pertencentes tanto á Atención Hospitalaria como á Atención Primaria, promovendo a participación nos diferentes estratos de cada área sanitaria.

A Xerencia da área sanitaria, de acordo co anterior e escoitada á persoa nomeada como Coordinador/a, nomeará aos membros do equipo do Nodo e o notificará á Axencia Galega para a Xestión do Coñecemento en Saúde.

O Equipo do Nodo de innovación da área sanitaria deberá contar, polo menos, cun técnico de innovación adicado a tempo completo ás actividades do Nodo, designado entre profesionais da propia Área Sanitaria ou da respectiva Fundación de Investigación Biomédica.

c) Os colaboradores dos Nodos de innovación, considerando como tal ao persoal que colabore co Nodo en actividades ou proxectos concretos en materia de innovación sanitaria.

d) Os colaboradores externos. Poderán incluírse persoas doutras institucións coas que as Areas Sanitarias ou o Servizo Galego de Saúde manteña acordos ou convenios de colaboración en materia de innovación.

4. Os compoñentes da rede de nodos de innovación non percibirán retribucións adicionais ás que lles corresponde no seu posto de traballo polas tarefas realizadas no Nodo.

5. Na composición da rede de nodos de innovación procurarase acadar unha presenza equilibrada de homes e mulleres.

Artigo 5. Funcións do Nodo central de innovación sanitaria

O Nodo central de innovación sanitaria representará aos diferentes departamentos dos servizos centrais da Consellería de Sanidade e do Servizo Galego de Saúde coas competencias que ten asumidas a Axencia Galega para a Xestión do Coñecemento en Saúde en materia de innovación sanitaria, de acordo coas seguintes funcións:

a) Coordinar e apoiar as actividades dos sete Nodos de innovación.

b) Xestionar e coordinar o funcionamento dos procesos da rede de Nodos de innovación sanitaria do sistema público de saúde.

c) Canalizar a información sobre os proxectos de innovación de ámbito nacional e/ou europeo cara os Nodos de innovación, fomentando a participación de profesionais nas actividades que deban realizarse nas áreas sanitarias relativas a estas iniciativas

d) Identificar os proxectos de innovación e as boas prácticas susceptibles de transferirse entre nodos.

e) Coordinar as actividades de formación en materia de innovación como entidade encargada da formación dos profesionais sanitarios, a proposta polos Coordinadores dos Nodos de innovación.

f) Organizará conxuntamente cos Nodos de innovación os Premios anuais de Innovación do Sistema Público de Saúde de Galicia.

g) Certificar as actividades realizadas polos Coordinadores, os compoñentes do equipo de soporte e a participación dos profesionais colaboradores nos proxectos e actividades da rede de Nodos de Innovación a fin do recoñecemento profesional.

Artigo 6. Funcións do/a Coordinador/a do Nodo de innovación da área sanitaria

O/A Coordinador/a do Nodo da área sanitaria atenderá ás seguintes funcións:

a) Coordinar as actividades do Equipo do Nodo de innovación.

b) Asistir ás reunións de coordinación da rede de Nodos de innovación e da Plataforma de Innovación Sanitaria convocadas polo Nodo central da Axencia Galega para a Xestión do Coñecemento en Saúde.

c) Comunicar ao Nodo central e á Dirección da que depende funcionalmente e á Xerencia da área sanitaria aqueles proxectos que superan a fase de presentación de ideas e as persoas que se incorporan como participantes en proxectos de innovación.

- d) Comunicar ao Nodo central e a Xerencia da área sanitaria as actividades do Nodo de innovación tales como xornadas, sesións, etc.
- e) Propoñer a oferta formativa en materia de innovación ao Nodo central.
- f) Colaborar na organización dos Premios anuais de Innovación do Sistema Público de Saúde de Galicia.
- g) Facilitar a comunicación con entidades do ámbito local susceptibles de formar parte do ecosistema de innovación a nivel local
- h) Identificar iniciativas susceptibles de realizarse no modelo de Living-Lab.
- i) Elevar ao Nodo central e a Xerencia da área sanitaria a memoria anual que recolle as actividades do Nodo de Innovación e as persoas que o integran a efectos de recoñecemento profesional.

Artigo 7. Funcións do Equipo do Nodo de innovación da área sanitaria

As funcións do Equipo do Nodo de innovación da área sanitaria serán as seguintes:

- a) Dinamizar as ideas e proxectos de innovación na área sanitaria, mantendo un rexistro dos mesmos e o control da súa evolución ata a súa realización ou desistencia.
- b) Manter unha listaxe de liñas asistenciais e non asistenciais nas que os profesionais da área desenvolven actividades de innovación.
- c) Identificar necesidades non cubertas susceptibles de xerar proxectos de innovación fomentando o modelo de Compra Pública Innovadora e o modelo living lab a través da rede de living labs de saúde de Galicia (LABSAÚDE).
- d) Apoiar a xeración de proxectos de innovación participando en convocatorias a nivel autonómico/nacional/europeo co fin de lograr financiamento para a súa posta en marcha.
- e) Levar o control da metodoloxía de avaliación e dos resultados dos proxectos de innovación.
- f) Participar na difusión dos proxectos de innovación do nodo da Area e da Rede de Nodos de innovación.
- g) Detectar e animar a profesionais que teñan inquietudes innovadoras a formar parte do Nodo de innovación e a presentar propostas de proxectos á Plataforma de innovación sanitaria.
- h) Manter unha lista de colaboradores do Nodo e informar periodicamente ás persoas incluídas na lista das actividades do nodo e das propostas formativas relacionadas con innovación a realizar dentro ou fora do propio sistema sanitario.
- i) Organizar as actividades do Nodo de Innovación, coma reunións, xornadas, sesións abertas, etc, fixando a axenda e elaborando unha memoria breve da mesma e a relación de asistentes.
- j) Elaborar unha memoria anual recollendo as actividades do Nodo de innovación, integrantes do Equipo do Nodo e membros Colaboradores do Nodo de innovación.

Artigo 8. Funcións dos/as colaboradores do Nodo de innovación da área sanitaria

1. A participación dos/as colaboradores do Nodo será voluntaria:

a) A alta dun/dunha profesional como colaborador/a producirase ao enviar unha consulta, idea ou pola participación en actividades de difusión ou formación en innovación. O/a profesional será notificado desta alta, podendo posteriormente solicitar á súa baixa.

b) A baixa producirase a petición propia podendo solicitar ao Nodo de innovación que non se lle envíen correos de comunicación.

c) Os/as colaboradores/as serán convocados/as a actividades de formación e a reunións temáticas.

d) Ofreceráselles participación nas actividades de proxectos ou xornadas de innovación, que serán acreditadas.

e) Participarán na presentación de proxectos de innovación ao Nodo e a Plataforma de innovación sanitaria. No caso de que o proxecto logre poñerse en marcha, recibirán acreditación de participación no proxecto xunto cos membros do equipo que o formen.

2. No caso de non enviar propostas de proxectos, non asistir a actividades de formación ou reunións no período de 1 ano, daráselles de baixa como colaboradores/as do Nodo de innovación.

Artigo 9. Coordinación cos Institutos e Fundacións de Investigación Biomédica

1. Co fin de fomentar a colaboración e mellorar a coordinación entre as actividades de investigación e innovación desenvolvidas nos Institutos e Fundacións de Investigación Biomédica e as iniciativas de innovación promovidos polos Nodos, os representantes das Fundacións e Institutos de Investigación galegos poderán participar nas reunións da rede de Nodos de innovación.

2. As Fundacións promoverán iniciativas conxuntas cos Nodos de innovación para financiar proxectos innovadores a desenvolver na rede asistencial por parte dos profesionais sanitarios.

3. Os Nodos de innovación poderán apoiarse nas Fundacións de Investigación para a xestión de proxectos de innovación financiados por terceiros para as tarefas de xestión.

4. A xestión dos beneficios obtidos pola explotación de proxectos de innovación atenderase ao disposto polo Decreto en vigor que regula a protección, valorización e transferencia dos resultados da investigación, desenvolvemento e innovación no ámbito do Sistema Público de Saúde de Galicia. A distribución de beneficios correspondente ao Servizo Galego de Saúde e as súas entidades instrumentais no tocante a proxectos impulsados polos Nodos, deberá destinarse ao financiamento das actividades do correspondente Nodo.

Artigo 10. Formación dos integrantes da rede de Nodos de innovación

1. A Axencia Galega para a Xestión do Coñecemento en Saúde, como entidade encargada da formación dos profesionais sanitarios, organizará anualmente a formación para o persoal do equipo de innovación dos Nodos e para os profesionais colaboradores, deixando abertas as

prazas que poidan quedar vacantes a outros profesionais interesados por proxectos de innovación, a través do Plan Estratéxico de Formación.

2. A formación estará orientada á adquisición de habilidades propias da innovación como: xestión de proxectos de innovación, presentación de proxectos, metodoloxías de innovación, etc.

3. Os/as coordinadores/as e membros do Equipo do Nodo de innovación terán preferencia para asistir ás actividades formativas programadas especificamente para os Nodos e Innovación. Posteriormente poderanse ofertar tamén ditas actividades aos Colaboradores do Nodo, e demais profesionais, por esta orde de prelación.

4. En todo caso, consultarase aos/ás coordinadores/as dos Nodos de innovación para que propoñan anualmente a formación en innovación que consideren máis necesaria para o desenvolvemento das súas funcións.

Artigo 11. Certificación da participación nas actividades da rede de Nodos de Innovación

1. A Xerencia da Axencia Galega para a Xestión do Coñecemento en Saúde a proposta da Dirección da Área de Desenvolvemento e Innovación Sanitaria e en virtude das competencias en innovación sanitaria outorgadas pola Consellería de Sanidade e o Servizo Galego de Saúde, certificará a participación nas actividades da rede de Nodos de Innovación a fin do recoñecemento profesional que, no seu caso, corresponda.

2. Establécense os seguintes requisitos para certificar a participación nas actividades da rede de Nodos de Innovación:

a) Coordinadores dos Nodos de innovación: Asistencia ás reunións convocadas polo Nodo central e a participación na organización das actividades reflectidas na memoria anual.

b) Membros do Equipo dos Nodos de innovación: Participación acreditada polos coordinadores dos Nodos nas actividades reflectidas na memoria anual.

c) Colaboradores dos Nodos de innovación: A participación nalgunha das seguintes actividades permitirá certificar a participación nas actividades da rede de Nodos de innovación como membro colaborador durante o ano:

- i. Asistencia ás reunións e/ou xornadas organizadas polo Nodo da área sanitaria (mínimo 3 reunións ao ano). O Equipo responsable do Nodo elaborará un acta das reunións que teña o Nodo ao longo do ano e un control de sinaturas ao iniciar e ao finalizar as reunións. A acta e as sinaturas de cada reunión remitiranse ao Nodo central. Ao final do ano elaborárase unha listaxe coas persoas que asistiron ao número mínimo de reunións validado polo coordinador do Nodo.
- ii. Realización de cursos de temática de innovación organizados pola rede Nodos de innovación.
- iii. Presentación de propostas e/ou participación en proxectos innovadores (mínimo 1 proposta/proxecto ao ano). Dende o Nodo central elaborárase unha listaxe das propostas presentadas que alcancen a fase de proxectos, ou da participación en proxectos de innovación da rede de Nodos de innovación sanitaria.

Artigo 12. *Recoñecemento na carreira profesional da participación nas actividades da rede de Nodos de Innovación*

1. As actividades realizadas polos membros da rede de Nodos de innovación recoñeceranse na carreira profesional como méritos no apartado de Innovación previa certificación pola Axencia Galega para a Xestión do Coñecemento en Saúde de acordo cos criterios establecidos no artigo 11, a través do novo epígrafe: C2.5. "Participación nas actividades da rede de Nodos de Innovación".

CAPÍTULO II

Desenvolvemento e implantación de proxectos innovadores

Artigo 13. *Apoio para o desenvolvemento e implantación de ideas e proxectos innovadores pola rede de Nodos de innovación*

1. A través da rede de Nodos de innovación sanitaria procúrase o desenvolvemento e a implantación de solucións innovadoras para o Sistema Público de Saúde de Galicia que xeren maior calidade e dean resposta aos retos en saúde que presenta a nosa sociedade.

2. A rede de Nodos de innovación é un instrumento aberto, proactivo e participativo que pretende:

a) Canalizar as ideas dos profesionais, pacientes, coidadores, empresas e demais perfís implicados no sistema sanitario público galego.

b) Transformar as ideas en proxectos con resultados aplicables á realidade cotiá da práctica asistencial.

c) Introducir cambios de forma áxil no sistema sanitario e substituír os procesos pouco eficientes por alternativas de maior calidade.

d) Avaliar e apoiar o desenvolvemento de proxectos.

e) Realizar o seguimento dos proxectos trala súa implantación.

f) Axilizar os trámites administrativos e toma de decisións.

g) Buscar as convocatorias de financiamento máis adecuadas e identificar e contactar con posibles socios para a súa posta en marcha.

h) Realizar tarefas de asesoramento e soporte para que o proxecto se transforme nun novo produto ou servizo sanitario.

3. A rede de Nodos de innovación conta cunha Plataforma de innovación aberta permanentemente onde recoller as ideas e facer seguimento das mesmas.

Artigo 14. *Criterios de priorización das propostas innovadoras*

1. As ideas e propostas innovadoras presentadas deberán demostrar que xeran un valor para os pacientes e o sistema sanitario, mellorando a calidade de vida dos pacientes ou a eficiencia do servizo sanitario no ámbito da provisión de servizos, prácticas asistenciais ou de xestión. Non poderán presentarse propostas xa comercializadas, transferidas á industria nin aquelas que teñan comprometida a súa licenza con algunha organización ou empresa.

2. Na valoración das propostas teranse en conta os seguintes criterios:

a) Prioridade estratéxica de innovación do Sistema público galego de saúde: valorarase o grao de idoneidade para desenvolver un proxecto nun momento concreto polas circunstancias específicas que o determinen.

b) Aliñamento e impacto coa Estratexia do Servizo Galego de Saúde: valorarase o grao de consonancia do proxecto proposto coa estratexia do Servizo Galego de Saúde.

c) Escalabilidade: valorarase o nivel en que as ideas son transferibles máis alá do centro en que se propoñen.

d) Innovación: valorarase a achega innovadora que supón fronte á práctica habitual.

e) Beneficios para o sistema sanitario público galego ou usuarios do sistema.

f) Participación dos cidadáns e pacientes.

g) Recursos necesarios para o seu desenvolvemento.

h) Identificación de compoñentes tecnolóxicos e de sistemas de información.

i) Identificación de métodos de avaliación de resultados.

j) Implicacións co tratamento de datos de carácter persoal: necesidade de avaliación dos Comités de Ética da Investigación e da comisión de estudos de alto impacto

Artigo 15. Xestión das achegas de propostas innovadoras á rede de Nodos de innovación

1. Calquera profesional, usuario ou axente externo poderá enviar as súas propostas de proxectos de innovación para a mellora do sistema sanitario a través da Plataforma de innovación sanitaria.

2. Tódalas propostas que se reciban a través da Plataforma de innovación terán unha avaliación individual de acordo cos criterios xerais establecidos no artigo 14. Os/as coordinadores/as dos Nodos de innovación das áreas sanitarias e/ou os membros do Equipo do Nodo nos que delegue, reuniranse como mínimo trimestralmente para avaliar tódalas propostas da súa área.

3. Os/as coordinadores/as dos Nodos comunicarán a través das reunións periódicas convocadas polo Nodo central ao resto dos Nodos das áreas sanitarias aquelas propostas que tiveron unha avaliación positiva e de ser o caso a súa posta en marcha ou a avaliación da implantación, co fin ser coñecidas polo resto das áreas sanitarias.

4. Tódalas propostas recibidas deberán ter resposta aos promotores das mesmas que poderá consistir na admisión do proxecto para a súa implantación no sistema, proposta de mellora da idea, ou o etiquetado como proposta "realizable" para a posterior inclusión nun proxecto maior ou iniciativa futura.

5. Ademais, co fin de axilizarse a posta en marcha de proxectos, propórase polo Nodo o financiamento directo daquelas ideas avaliadas positivamente que teñan un custe menor a xestionar pola Área Sanitaria ou a Axencia Galega para a Xestión do Coñecemento en Saúde segundo dispoñibilidade orzamentaria.

6. No caso de propostas avaliadas positivamente que requiran dun financiamento para o cal non exista dispoñibilidade orzamentaria suficiente elevaranse ao Comité de selección da Plataforma de innovación sanitaria descrito no artigo 16 a proposta dos Nodos de innovación, quedando en caso de aprobación, supeditado a dispoñibilidade orzamentaria ou a captación de fondos de innovación mediante programas ou convocatorias que permitan o seu financiamento

Artigo 16. Comité de selección da Plataforma de innovación sanitaria

1. Aquelas propostas susceptibles de ser aplicadas en toda a organización e/ou cun impacto económico que requiran dun financiamento para o cal o respectivo Nodo non dispoña de dispoñibilidade orzamentaria suficiente logo da avaliación positiva por parte da rede de Nodos de innovación elevaranse ao Comité de selección da Plataforma de innovación sanitaria.

2. Formarán parte deste Comité as persoas designadas pola Xerencia da Axencia Galega para a Xestión do Coñecemento en Saúde. Os membros non percibirán retribucións de ningún tipo.

3. Procurarase unha representación equilibrada en función da tipoloxía de proxectos dos diferentes órganos que conforman a Consellería de Sanidade, o Servizo Galego de Saúde e demais entidades instrumentais do sistema público galego, e terá capacidade para ditar apoios explícitos aos proxectos.

4. A Presidencia do Comité recaerá na Xerencia da Axencia Galega para a Xestión do Coñecemento en Saúde e a Secretaría na Dirección da Área de Desenvolvemento e Innovación Sanitaria.

5. Este Comité reunirse con carácter cuatrimestral, ou cando o número de propostas sexa significativo

7. As propostas serán avaliadas segundo as fases aplicables en cada caso: ideación, desenvolvemento da solución, solicitude de financiamento externo, desenvolvemento de proxectos de Compra Pública Innovadora, avaliación en entornos *living lab* da rede LABSAÚDE, e/ou opcións de protección, valorización e transferencia como creación de spin-offs.

Disposición adicional única. Inclusión da Participación nas actividades da rede de Nodos de Innovación como mérito na carreira profesional

As actividades realizadas polos membros da rede de Nodos de innovación recoñeceranse na carreira profesional como méritos no apartado de formación, docencia, investigación e innovación ou, no seu caso, no de implicación ou compromiso coa organización.

Disposición derradeira primeira. Entrada en vigor

O presente decreto entrará en vigor o día seguinte ao da súa publicación no Diario Oficial de Galicia.

Santiago de Compostela, xx de xxxxxx de 2023

Alfonso Rueda Valenzuela

Presidente

Julio García Comesaña

Conselleiro de Sanidade